

LA QUOTIDIANA

FMR Fundaziun Medias Rumantschas, Via da Masans 2, 7000 Caira, 081 544 89 11, redacziun@fmr.ch



Buna bilantscha per il «Surselva Lab»

Avant in onn han la Regiun Surselva e la Scol'auta spezialisada realisà il lavuratori da projects «Surselva Lab». [Pagina 5](#)



Nagin avegnir per la Porta Alpina

La regenza vesa nagin avegnir per la Porta Alpina, sco ella scriva sin ina dumonda parlamentara. [Pagina 5](#)

FMR FUNDAZIUN
MEDIAS
RUMANTSCHAS

südostschweiz

SVIZRA

Il segund cusseglier federal rumantsch?

Il num da Jon Pult croda il davos temp savens en las medias naziunalas, sch'i va per specular, tgi che pudess daventar il successeur da cusseglier federal Alain Berset. Tant la NZZ sco per exempel er il Tages-Anzeiger attestan al socialdemocrat grischun in grond dun da communitgar e talent strategic. El vegn enumerà en la glista da candidats cun schanzas. Ma tge di el sez?

«Jau n'hai anc betg decis definitivamain. Jau sun anc adina en il process approfondi d'evaluaziun», respunda Jon Pult sin la dumonda, sch'el candideschia.

Sia candidatura fiss insatge extraordinari per la Rumantschia. Fin uss hai numadamain dà be in soli cusseglier federal rumantsch – e quai avant passa tschient onns: Il commerciant ed advocat Felix Calonder è stà en la regenza svizra dal 1913 fin il 1920. (fmr/vi) [Pagina 2](#)

GRISCHUN CENTRAL

20 Saurers a Savognin



Exact an lengia scu tgi totga per camiuns dall'armada.

FOTO GION NUTEGN STGIER

20 proprietaris cun lour camiuns da militer dalla marca Saurer èn sa scuntros sonda passada a Savognin. I sa tracta da vehichels tg'èn nias produtgias tranter igl onn 1983 ed igl 1987. Organiso chel inscunter è Laurin Luzio, igl om da 25 onns da Savognin. El è en grond amei da chels camiuns da militer e posseda er gist sez dus da chels vehichels. Igl mecanist e diagnosticher è benevento sonda passada cun igls targlischonts igls sies 19 ameis dall'antiera Svizra cun lour Saurers. El e sies cunorganisator Roman Porta vevan chinto angal cun diesch participants. Rivos a Savognin èn els gio venderde seira, sonda ins è pudia contemplar igls camiuns tg'èn per gronda part nias transformos an campers. Siva èn igls camiunists partias direcziun Pass digl Gelgia. (fmr/gns/sab) [Pagina 8](#)

SURSELVA

Il tuccher che sa tuccher sil viv

Mintga cultura ha sias tradiziuns. Ellas cristianas ei il tuccher ina da quellas. Semegliont al muezin che cloma ellas tiaras islamas giu dil minaret, tuccha il zenn mintga damaun il gi niev. Hosps che vegnan si dils marcau san resentir quei tuchiez. Aschia sevila in tal ch'ei staus gl'uost a Sedrun. Suentar treis dis hagi el stuiu quasi fugir, san ins leger ella brev da lecturs ch'el ha scret ellas gasettas da Samedia. Gl'um vilau cumpareglia il tuccher da dis cul barschar strias, era quei hagen ins stuiu dismetter. Aschia duessien ins era dismetter ni silmeins adattar il disturbi dil ruas pervia dil tuccher da dis allas 05.30. Ina retschera a Laax e Glion muossa ch'igl ei in problem da luxus. (fmr/abc) [Pagina 3](#)

A Valchava vain tessü ün «Zumthor»

Bod 100 ons ha l'affar da tradiziun da la Tessanda Val Müstair gnü seis sez a Sta. Maria. Uossa vout ella fabricar ün nouv lavuratori cun butia a Valchava – insembel cun l'architect da renom Peter Zumthor.

DAVID TRUTTMANN/FMR

Id es üna surpraisa, quai cha la Tessanda Val Müstair ha «tessü» tuot adascus dürant ils ultims mais. Ma quist'eivna es l'instituziun da tradiziun gnüd'oura cul marmuogn: La Tessanda vout fabricar immez Valchava ün nouv edifizi cun lavuratori e butia. Il terrain da fabrica pel proget ha ella fingià acquistà. Ed ella s'ha eir fingià missa in colliaziun cun Peter Zumthor, l'architect da renom da Haldenstein, chi s'ha declarà pront da realisar insembel culla tessundas quist nouv stabilimaint. La mainagestiun da la Tessanda, Maya Repele, e sia squa-

«Ün nouv lö da lavur e da vendita dess novas perspectivas per novas offertas.»

Maya Repele, mainagestiun Tessanda Val Müstair

dra lessan cun quist nouv «dachas» guadagnar visibilità ed arcugnuschentscha pel vegl artichanadi da la tessonda: «Ün nouv lö da lavur e da vendita dess novas perspectivas per novas offertas.» Cha la Tessanda ha insomma cumanzà a ponderar vi d'ün nouv stabilimaint ha da chefar cun sias localitats actualas. Las 17 tessundas lavuran daspö l'on 1958 in üna chasa veglia immez Sta. Maria, la quala vess nair dabögn d'üna sanaziun a l'ingronda. Quella sanaziun nu vess però portà a la Tessanda las perspectivas giavüschadas – e perquai es nada l'idea d'ir a Valchava, sün trais parcelas amo verdas dasper il sviamaint. [Pagina 7](#)

«Aschia che la Porta Alpina resta quei ch'ella ei – in ascensur per ils pumpiers.»

Il commentari sin il punct da noss redactur Andreas Cadonau. – Pagina 5



FOTO MAD

In plazzal d'art a Favugn

La scena d'art e la branscha da construcziun han atgnamain da far pauc in cun l'auter. Auter è quai stà tar in'acziun d'art speziala che l'interpresa HEW da Caira ha instradà ed organisà l'emna passada, en connex cun il giubileum dad 85 onns da l'atgna firma. Ella ha laschà lavurar set artistas ed artists grischuns en ses lavuratori a Favugn – cun l'idea da fotografar ed exponer lura quest atun las ovras sin ils plazzals da construcziun. Da la partida a quest'acziun è era stada l'artista Esther Schena (fotografia) ch'ha fatg stampas sin aissas d'armar. (fmr/dat) [Pagina 2](#)



30038



Servetsch d'abunents e da
distribuziun: tel. 0844 226 226
mail: abo@somedia.ch

9 771424 749004